



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Chile tir election nung Gabriel Boric-i takok nguogo

Assam MP Pradyot-i Voter ID den Aadhaar link asütsü maparen aitsü



VOL. XIX NO. 74 (ADOK 74)

DIMAPUR

SANGTENNÜ (TUESDAY)

LUCHII (DECEMBER) 21, 2021

₹ 5.00

Dimapur -Mkg bus ka lendong ajuru

Dimapur, December 20(TYO): December 20 nikongdang Dimapur nungi Mokochung-i atuba A One bus (private bus ka) Silonijan matongdang Barpathar, Shantipur nung lendong ajurua nisung yiruba osang angazüker. Osang ajanga angazükba

agi, iba bus jakdang truck gari kati anena aliba truck gari ka dak atsük aser idangji ajungbena bus ji manetet ser truck gari tesülenji oa kanga sashia atsük. Iba lendong nung nisung 6 yiru aser teyirurtemji Dimapur mozü kidang anepaludar ta angazüker.

State sorkari memolungaka Centre-i AFSPA benoker: Y Patton

Kohima, December 20, 2021(TYO): State sorkari magizükaka Nagaland nung küm aika Armed Forces Special Powers Act (AFSPA) 1958 magiener ta Deputy Chief Minister Y Patton-i ashi.

"AFSPA, 1958 nung Section 3 nung Centre sorkar mesüra state indang Governor-i 'disturbed area' ta sangoktsüba sülen ang iba Act benoktsü lateta lir. Iba ama tesem ka nung armed forces-i civil power yaritsü nungdaker ta asü nungang Act benoktsü akok" ta Y Patton-i tanü Assembly nung jembidang ashi.

India sorkari ita trok shia Nagaland state ajunga 'disturbed area' ta sangoktsür aser küm aika AFSPA, 1958 benokba magiener, ta paisa ashi.

India sorkari tesüsabuba

sangoktsübaji June 30, 2021 nung liasü aser iba mapangji tan December 29 tashi lir, ta paisa shisem.

India sorkari 'Disturbed Area' mesangoktsüdang state sorkar indang tebilemba asüngdang aser state sorkari asüngdang shia law & order tajungba kümogo anungji Disturbed Area magizüker ta shiyonga arur, ta Y Patton-isa metetdaksü.

"Naga yimten telok ajak India sorkar den ceasefire nung lir anungji 'Disturbed Area' ta mezüngoktsüla. Assembly nung züngsem shiai India sorkar dang nüboritem ola angashitsüla aser Nagalans state nungi AFSPA 1958 agientsü atema takhangba agütsü ayongzük" ta Deputy CM-isa ashi.

BAN-i CM Rio den senden amen

Dimapur, December 20, 2021 (TYO): Business Association of Nagas (BAN) president L. Mongkum Jamir-i anir teshimtet telok kati Nagaland chief minister Neiphiu Rio den ajurutepogo.

Iba senden nungi BAN-i Chief Minister dang Dimapur nung aliba MSME complex nung Food and mineral testing lab ka lapoktsü atema Union Minister of MSME dangi shidi ka zülutsü mepishia metetdaksü.

Nagaland kübok district ajak nung industry dak sendakba maparen kanga tongtipang lir anungji MSME schemes ajanga district shia nung Industrial Estates lapoktsü mepishir ta BAN-isa Chief Minister Rio dang ashi.

Dimapur Town Hall tia kanga mejungi aliba atema BAN-i PPP mode nung acha-ayanga repringtsü asoshi CM dang ashi.

BAN-isa Chief Minister lenisüba kübok shishilembar peria adenba Entrepreneurship Promotion Council ka tentettsü tebilemba lemsatop.

"Asen loktiliba ya kechisarena adokdaksüba masü saka tangari yanglua aliba agiba loktiliba ka lir. Anungji shishilembar tetantsü aser bendanga agütsürtem kanga nungdaker" ta chief minister Rio-i ashi.

"Nagaland nung industrial sector renlokdaoktsü atema raw materials angudak unit tem lapoktsü nungdaker. Tanü nüboritemi langka tasen aginür anungji asen sobaliba, teka mapa aser osettem balaka aliba ya ajungkettsüla" ta paisa ayongzük.

"BAN-i maparen balala inyakba atema tenüngsang agütsür. State ka indang r o n g s e n k e t z ü n g j i rongsenketzung maparen ajanga dang ajungkettsü aser iba nung BAN-i shilem tulu agitsüla" ta CM Rio-isa metetdaksü.

Iba senden nung BAN züngsemtem, advisors, Principal secretary to chief minister K.D Vizo aser Joint Director MSME-DI Dimapur Taliwati Longchar nungertem aden.

Indian Army-i Oting nung atalokba osang meshir

Guwahati, December 20, 2021 (Agencies): Nagaland kübok Mon district nung December 4 nü Oting yim nung tai maket civilian tem tepsetba dak sendakba osangtem metetnür ta Indian Army-i metetdaksüogo.

Iba lendong ajanga linük ajungalen nisungtem aokdadaksü aser Army-i bushisüngdangba maparen nung public nungi osang aginür.

"Nisung kari iba dak sendakba videos, photos mesüra tanga osangtem lira (not forwarded or not from secondary sources)

+916026930283 nung phone mesür SMS mesüra Whatsapp Messenger ajanga yokang. Mesüra Army exchange helpline +913712388456 nung tongtepan" ta Indian Army-i metetdaksü.

"Osang agütsürtemi parnok maitsü yimjak nung memetdaksünüra miimbanga ayutsü" ta parnokisa ashi.

Nagaland nung civilian 14 khasetba lendong atema Indian Army-i Major General rank ketdangsur ka lenisüba kübok court of inquiry ka asütsü tetuyuba agütsüogo.

Nagaland Assembly-i AFSPA agientsü aser Naga yimten latettsü akhanger

Kohima, December 20, 2021 (TYO): Hombarnü Nagaland Legislative Assembly-i India sorkar dang North East aser talisa Nagaland nungi AFSPA 1958 agientsü atema takhangba agütsü bangjemtepogo.

NLA-isa yimjung bener arutsü atema Indo-Naga yimten olemteperem dang tatem küm tembangtsü ayongzükogo.

Tanü NLA indang anogo ka special session alidang Chief Minister Neiphiu Rio-i iba onük benokba teloki agizüka ayu.

December 4 aser 5 anogotem Mon district nung sepaitemi civilian 14 khasetba sülen Armed Forces Special Powers Act (AFSPA) aser Nagaland nung iba Act ajanga timtem bentsür arubatem jembitsü atema Assembly session ya jazüka agi.

December 4, 2021 nü Mon District kübok Oting - Tiru Village tesem nung Indian Army indang 21 Para Special Forces-i tai maketba nisung 13 khasetba aser iba sülen ano December 5 nü Mon jila nung

civilian ka khasetba khukhua aitsür ta NLA-i metetdaksü.

Tai maketba nisungtem tepsetba atema bangdakpurtemi iba tatalokba atema tatok meshitsüba den ozüngi melaba ama temeten agütsü nungzüksüla ta State Assembly-isa takhangba agütsüogo.

State Assembly-isa Mon district nung alirtem, civil society tem, state nung sensotem aser lokti tentettem dang sorkar den amalitepa yariteptsü mepishia metetdaksü.

Nagaland nung sensotem aser civil society teloktemi AFSPA agientsü aser temeten meshiba atema tenüngsang agütsür aser pusema nungiter. Nisung ajaki ozüngi melaba ama timi dang aser longjemer mapa inyaksü mepishir ta state assembly-isa metetdaksü.

Naga nungeri küm aika Naga yimten latettsü atema shiyonga arur anungji nisung ajaki nüboritem ola angashitsü aser akhümsübuttsüla ta parnokisa ashi.

Indo-Naga yimten olemteperem nung shilem agir ajak dang tekaratiba nung maparen

tembangtsü aser ajaki agizükteba telemteba agitsü mepishir, ta NLA-isa metetdaksü.

Naga yimten timi latettsü atema India sorkar dang North East aser talisa Nagaland nungi AFSPA 1958 agientsü takhangba agütsür ta tanü Nagaland Legislative Assembly-i bangjemtep.

Tanü Assembly nung Nagaland nung AFSPA benokba indang onük olemtepdang Chief Minister Neiphiu Rio, Deputy Chief Minister Y Patton, Leader of NOF legislature Party T R Zeliang, BJP president & Minister Temjen Imma Along nung dena MLA 15 shi kati ojembi.

Nagaland sorkari Assembly nung AFSPA anema telemteba agibaji tan agi tasembenbuba asütsü. Taoba mapang March 3, 1971 aser July 27, 2015 anogotem nunga NLA-i kasa bangzüngtem agiogo.

Tanü voice vote ajanga agizükba sülen NLA Speaker Sharingain Longkumer-i session tembanga liasü.

NE CM temi AFSPA anema longjemer noktaksüla: MPCC

Shillong, December 20, 2021 (Agencies): Meghalaya nung Congress teloki North East nung Chief Minister ajak Armed Forces (Special Powers) Act, 1958 anema longjemtsü ayongzükogo.

Nagaland nung tawa lendong atalokba sülen Meghalaya Congress-i iba temepishiba agütsüogo.

AFSPA indang putiotsü kanga majung lir aser iba ya joko mebeshitetsü ta Congress-i ashi.

"Centre sorkari AFSPA ajanga telungpur anema raratsü atema Army aser armed forces amshitetsü saka kasa mapang iba Act ajanga sepaitemi ozüng alema tashiyim inyakba asoshi okadak ken o benoka jembitsü noktanger" ta Meghalaya Pradesh Congress Committee-i ashi.

"Centre-i state sorkar tem den asüngdangtepba sülen ang AFSPA benoktsü akok anungji tang nungi North East state tem nungi Chief Minister temi AFSPA anema

longjemer noktaksü" ta MPCC-i metetdaksü.

State sorkartemi Centre dang law & order dak sendakba maparen police-i inyaktetsü ta ashitsüla ta MPCC-isa ashi.

"Centre-i state sorkartem den asüngdangyaba sülen ang AFSPA benoktetsü. Anungji state shiai Centre dang AFSPA menüngdaker aser pei pei state police force-i law & order anepalu süteter ta shidi zülutsüla" ta MPCC-isa metetdaksü.

COVID-19 Nagaland: 1 dak dang putet

Kohima, December 20, 2021 (TYO): Nagaland nung Hombarnü nisung ka dak dang COVID-19 putet aser iba nisung züngsema nisung ajak agi 32,170 kümogo.

"Tanü Dimapur nung nisung ka dak COVID-19 putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

Tang nisung 83 anepaludar saka parnok 65 dakbo shirangba yimya kecha mali, ta pai ashi.

"Honibar tashi nung nisung 757,668 nem COVID-19 vaccine indang dose 13,29,202 agütsüogo" ta State Immunization Officer Dr Ritu Thurr-isa ashi.

Vaccine agirtemji frontline workers 60,983, healthcare workers

16,005, arishi küm 45 ser temapur 213,695 aser arishi küm 18 nungi 44 tsüngda alir 466,985 lir, ta paisa ashi.

Vaccine agirtem rongnung nisung 571,534-i dose anaprong agiogo. Parnokji frontline workers 48,603, healthcare workers 13,540, arishi küm 45 ser temapur 178,034 aser arishi küm 18 nungi 44 tsüngda alir 331,357 lir, ta Dr Thurr-isa shisem.

Lahorijan nung sorkar ali atsünga agirtem meindok

Guwahati, December 20, 2021 (Agencies): Karbi Anglong Autonomous Council (KAAC) indang Land Revenue department-i Hombarnü Nagaland artsü anasa aliba Lahorijan tesem nung ali atsünga agirtem meindokogo.

Iba mapa nung district administration aser police-i department den yaritepa liasü.

Nisungtemi KAAC revenue land atsünga agiba meyipa agitsü atema iba mapa ya tanü inyak aser ketdangsurtemi Bokajan Sub-Division kübok Lahorijan Block 3 nung aliba Dudu Colony area nung ali atsünga agirtem meindok.

Taoba mapang KAAC indang Land Revenue department-i iba tesem nung ali asazük aser sorkari ali atsünga agiba nisung 107 shi ka nem eviction notice agütsü.

Ajisüaka, nisung 6-i Guwahati High Court nungi temelaba angu aser tanünga nisungtem tanü

sorkar li nungi meindokogo.

CRPF aser Assam police dena sepai 420 tashi iba mapa inyakdang timtem madokdaksütsü atema mapa lenzüka liasü.

Tensa süngjema ayutsü atema district administration-ia Lahorijan nung section 144 CrPC ozüng agütsü. Dudu Colony temeket nung metre 700 telongtet nung dokan aser shishilembadak ajak shibang.

Iba mapang Karbi Anglong Deputy Commissioner Dibakar Nath aser Superintendent of Police Pusparaj Singh naprong liasü.

Hombarnep 8:00 ako meta ketdangsurtemi excavators aika bener arur kiojen 115 shi bendoktsü.

Sorkar ali indang tasazükji mejangja saka KAAC Land Revenue department ketdangsur kati bigha 100 shi jungnüa lir ta ashi.

Dudu Colony nung alirtem teimba ka Nagaland kübok Dimapur nung aayangertem lir.

Nagaland arrtsü anasa aliba Lahorijan aser Dudu Colony kübok tesem ajak ya KAAC indang revenue land mesüra Nirmal Kumar Tea Estate indang ali lir.

Iba tesem nung alir nisung kari dang KAAC indang revenue department-i agütsüba land documents shitakba bena lir.

Ali kanga atsünga agibaji Nirmal Kumar Tea Estate lir aser küm ishika tsüngda iba tea estate indang ali aika atsünga agiogo.

Ketdangsurtemi Muslim nung dak dang tenük yonga inyaker ta tanü Dudu Colony nung ki raksaja endoktsür kati ashi.

Sorkari ali atsünga agirtem shitak meindoknüra Dudu Colony nung dang masü saka Lahorijan ajanga nung inyaksüla, kechiyong Nirmal Kumar Tea Estate aser temeket nung takar aikati ki tajungtem yanglua lir, ta iba nisungisa ashi.

AWO-i Dimapur nung tsurabur maliba tanurtem semdang



Dimapur, Luchii/Dec. 20 (TYO): Angami Women Organization (AWO) ketdangpurtemi December 17, 2021 nü Dimapur kübok Virazouma Village nung tanur 28 aliba Grace Mission Orphanage aser tanur 17 aliba Nagaland Outreach Children's Orphanage semdanga liasü.

Khristmas ya tepela aser nisung meimchir asoshi mapa tajung inyakba mapang ka lir. Yamaji Khristmas mapang

Naga nunger kibong timba nung temeim, tepela, chiyongtsü tajung aser aben süoshi tale magi sünga alir.

Saka asen lima kinük tezülen tanur ishika Khristmas mapang tsurabur temeim, chiyongtsü talem mesüra aben süoshi talem aginüa lir, ta AWO züngsemtemi tsurabur malirtem semdangba mapang ashi.

Anungji Khristmas temeim sayua, tsurabur malirtem

anidena anepaluba tesem ana nung chiyongtsü agütsü aser tanur shia nem blanket agüja liasü, koba Angami Gazetted Officers' Krotho (AGOK) puri Angami Public Organization (APO) küm 50 ajungba nüngtem nung December 14, 2021 nü jeli Khristmas sentong agidang tenla bendenba nungi alitsüba liasü.

Iba mapang tanurtemi ken aten aser otsü shitepa kati ka asoshi sarasademja liasü.

BBBP Nagaland indang training ka agiogo

Dimapur, Luchii/Dec. 20 (TYO): Multi-Sectoral districts of BBBP, Nagaland indang District Commissioner aser Nodal Officer tem asoshi orientation aser training indang webinar ka December 17, 2021 nü State Level BBBP, Mahila Shakti Kendra ajanga ayongzüka agia liasü.

Iba sentong nung onir, Juliana Medom, BBBP State Team Leader ajanga BBBP kübok state nung maparen balala inyakba indang asadanga lemsatepa liasü.

Sarah R. Ritse, Commissioner and Secretary, Department of Social Welfare aser Administrator, NSSWB ajanga multi-sectoral district tem dang BBBP scheme ya tali tashi taitba kumdaktsüsi ajungshia liasü.

District Administration ajanga pei pei district tem nung BBBP scheme tem kanga junga inyakba atema KhrienuoTachü, Chairperson, Nagaland State Commission for Women ajanga iba sentong nung tenüngsang agüja liasü.

Tesem tezülen aliba yimtsüngtem nung tali shilem agiba ajanga nüburtem tsüngta temelenshi tali arutsü, ta lai ashi.

Neingusalie Theünuo, Assistant Director ajanga BBBP scheme tem yimdak yimtsüngtem nung inyaker, Angawadi Worker nem awareness aser training tali agütsüsi ajungshia liasü.

Iba webinar ya tasüngdanga aser telangzüba mapang agiba sülen tembanga liasü, kong lenir balalai pei tangatetba aser tebilemba lemsatepa liasü.

Naga Students' Federation office khen atema shibangtsü

Dimapur, Luchii/Dec. 20 (TYO): Benjong mapang aruba ajanga Naga Students' Federation (NSF) indang office ya December 23, 2021 nü nungi tenzüka January 15, 2022 tashi shibanga alitsü, ta NSF tir Kegwayhun Tep aser tongti zülur

Siipuni Ng Philo natin sangdong ka nung ashi.

Federation ajanga ajak dangi Khristmas benjong aser Küm Tasen benjong salem abener. Iba mapang kinungertem lungjemba mapang asen takum dangi teimla tasen arujang, tesendaktep raksar

aliba yanglushijang aser Yimjung Chuba asoba ajak lungjemer benjongti, ta ayongzüka liasü.

Osang tsüsang balala atema Federation den nagastudents1947@gmail.com ajanga tongteprateptsü akok, ta sangdong ajanga ashi.

Nüburtemi Consumer Helpline Number amshitsüla: NVCO

Dimapur, Luchii/Dec. 20 (TYO): Hopta ka tepiyong 'National Consumer Day' amungba nung shilem ka ama Nagaland Voluntary Consumers' Organisation (NVCO) ajanga Nagaland State Consumer Helpline Toll Free No. 1800-345-3701 tali tejangjaba prokshia liasü.

Government of Nagaland aser talisa Department of Legal Metrology & Consumer ajanga Nagaland State Consumer Helpline Toll Free No. 1800-345-3701 ya amshir, koba linük nung danga state consumer helpline ka ama Nagaland Voluntary Consumers' Organisation (NVCO) den lungjemer amshia arur.

Consumer helpline office ya Khonoma Rupfuno Building, 2nd Building, D-Block, Kohima Town nung lir. Nagaland State Consumer Helpline nung

Project Manager aser NVCO tir, Advocate Kezhokhoto Savi-i ashiba agi, iba Helpline ya National Consumer Day nung December 24, 2011 nung amenoka liasü.

Iba Helpline ya ajanga products & services ajunga nung counselling agüja arur aser State dak sendakba nung data information ya yanglu aser ibaji alternate consumer dispute redressal mekanisim ka lir, koba Toll Free telephone No. 1800-345-3701 ajanga mapa inyaker aser nüburtemi iba number nung consumer dak sendakba tetsükdaktsü aser tebilemstü jangjatetsü aser osang agitetsü.

Consumer temi mangatetjemba mesüra metetnüba mesüra company/shishilempar/service agütsür temi külakoktsü amai bilemra 1800-345-3701 nung jembitsüla

aser iba call charges ya Helpline Office dangi aotsü.

Iba Helpline ya consumer tekumdang kumdaktsüsi asoshi inyaker.

Consumer movement takok angutsüji state nung nüburtemi meteta aliba dak keta lir, aser yangji yimdak-yimtsüng nung alirtem dena lir, ta Savi-i ashi.

Consumer dang parnoki aliba oset nung quality marks metettsü sayutsüla, aji asünung dang parnok mashioktsüsi. Parnok dang oset alir receipt meshitsü, oset raksatsü anogo metettsü sayutsüla.

Nüburtem aser talisa yimdak-yimtsüng nung consumer tem nem item shisatsü agütsüsi asoshi kija, sorkar aser NGO tem külemi inyaksüla, anungji dang parnoki meranga inyaker aazükba sen amajok nung meindoktsü, ta ashi.

Impur Christian Hospital ajanga metetdaksür

Dimapur, Luchii/Dec. 20 (TYO): Impur Christian Hospital nung Dr. Sentila, MD Chest Medicine ya December 27 - 30, 2021 anogotem anepdang 9:30 ako nungi ajurutetsü akok, ta Dr. Akaba, Medical Superintendent, ICH

ajanga sangdong ka nung metetdaksü. Anungji nüngdakba purtemi shia aliba anogotem aser mapang nung arua temang reprangdaktsüsi aser anepalutsü osang sangdonger, ta paisa ashi.

GPS Totok Chingnyu A nung tesayur shimogo

Dimapur, Luchii/Dec. 20 (TYO): School Education Department ajanga 25-09-2020 nü Advertisement ka ajanga sangdongba ama,

Dept. of Art & Culture ajanga pelaba lemsateper

Dimapur, Luchii/Dec. 20 (TYO): Kisama nung Hornbill Festival 2021 alidang anogoshi amai sobaliba sentong agidang cultural troupes 17-i shilem agia sobaliba tajung sayuba atema pelaba lemsateper, ta Department of Art & Culture ajanga sangdong ka nung ashi.

Phesama Youth Organisation, tir aser külem tenzüker, Kigwema Youth Organisation, tir aser pa den külem tenzüker temi cultural

troupes tem anepalua aser anisüngzükdangtsüba atema pelar, ta Department ajanga ashi. Sentong balala lenir, Kenny Kessen aser Aolemla Imsong nati rongsen agi malizüktetba teyari agütsüba atema pelar aser parnok den külemi iba sentong takok ngutettsüsa anibelem mesasai inyakba atema parnok officer aser staff tem danga kanga pelar, ta kasa sangdong ajanga ashi.

GNM & FHW training atema metetdaksür

Dimapur, Luchii/Dec. 20 (TYO): Directorate of Health & Family Welfare ajanga taoba mapang sangdongba ama, academic session 2021-2022 agitsü asoshi shimteta aliba candidate (merit wise) tem ya Department indang website www.nagahealth.nagaland.gov.in

nungi download sütettsü aser DHFW Office Notice Board nunga angutsü, ta Principal Director, Health & Family Welfare ajanga sangdong ka nung metetdaksü. Menden lemsatsüba aser admission indang osang yabo khen lir ang metetdaksüsi, ta kasa sangdong ajanga ashi.

DECEMBER 4TH & 5TH 2021 NUNG ATALOKBA OSANG SANGDONGER

Tebang agi mejembitetba lendong nung yimdaklir tai maketer nisung 15 Indian Army ajanga tashiyim agi taochi makai Oting yimdak Mon District nung December 4th & 5th 2021 anogo nung tepsetba ayimoktsür. Indian Army ajanga Naga nunger tashiyim agi 1954 nungi tenzüka tepsetjen tepsetdar. Indian Army-i tashiyim agi tai maliba nübu noklang merijang aika dang tang tashi tepsetdaki. India sorkari tashiyim agi Naga lima rakzüka par yimden yimsüsüba kübok ayutsü meranger, aser item tasa nung kodang tamakok alu, sorkari AFSPA (Arm Force Special Power Act) 1958 amshia Nagaland tepsettsü meranger. Tasa tamajung agi Nagaland State Indian Uion nung enoksema Nagaland Military yimsüsüba agi amokbangtsü bushir. AFSPA/1958 ya amshia tai maketer dak yazü agi mulung malem tasa yanglua asaa tepseter aser aji par konang tulu küma jembir. December 4 & 5 nung Mon District kübok Konyak Naga nunger Oting nung tanü poksüng ayanger rogo shiruru jenjang nung amshio, aji agi Nagaland amoksepba kuli tejangja sayur. Tanübo item tatalokba osang alimai jangjaogo. Tashiyim agi asaa tepsetbaji aoksa tepsetba mapa masü, saka parnoki asaa tasa yanglur meita atar tepsetba ta kuli jangjaogo. Iba tamachi mapa ya meimchir anema inyakba masü no(?). Naga National Council (NNC) aser Federal Government of Nagaland (FGN) ajanga alima ajak nung yimjung meimer kintemi India nungeri mapa tamajung ya meimchir temeden anema ta sangdongdaktsüsi bushitsü. Onoki alima rangben tanishir dang aser tembar lima rogo dang iba mapa aroksaa bushiang ta mebishitsü. Ano Naga nunger taliba jenjang tang tensa amai mekapanger military ajanga merenshiba nungi chiokang ta ashitsü. Naga nungerji India nunger masü aser Naga limaji India nunger meyong masü. India nungeri Nagaland tangsa toktsüsi.

NNC aser FGN nati temulung taroktiba nungi tasür kibongterm atema aria bilmer. Onoki nenok den tawak tasü aser mulung raksa anepjang ta asen Kibuba dang tesünep meshitsür. Nenok tanülatem shir taküm samaogo, itemji anisüngzükdak yujangma.

Date Oking: 20th Dec, 2021

Sd/-
L.Reba Lkr
Advisor Former Midan Peyu
Ao Region NNC/RGN

Assam MP Pradyot-i Voter ID den Aadhaar link asütsü maparen aitsü



Pradyot Bordoloi (File photo)

Guwahati, December 20, 2021 (Agencies): Election Laws (Amendment) Bill, 2021 benokba maparen anema Assam Congress lennir aser Nagaon MP Pradyot Bordoloi-i Lok Sabha indang General Secretary dangi tezüluba ka yokogo.

Lok Sabha indang General Secretary dangi züluba shidi nung, Bordoloi-i, Aadhaar unique identification den voter identification link asütsü asoshi sub-section ka benokba inyakim ya "Supreme Court telemtetba anema lir" ta shia lir.

Bordoloi-i ashiba agi, Supreme Court telemtetba nung, "Aadhaar authentication ya welfare programmes aser

income tax maparen atema PAN number den link asütsü asoshi atakzükja lir."

"Nübur nem agütsüba temeden tongtibangtiba 'right to vote' ya nisung ka maitsü jangjatsü, talisa Aadhaar data raksatsüdang aser Aadhaar database ano junga mebenteti aliba tebilemsü dak sendakba nung database den link süa iba temeden lendongbang nung yutsütsü makok," ta Bordoloi-i metetdaksü.

Iba amala mapatong ajanga political party temi voter inyakim metettsü, koba ajanga voter rights aser election ochishishia agitsü asoshi lendong adokdaksütsü," ta Assam nungi Congress lennir Bordoloi-i ashi.

Voter inyakim asadanga aser data set tem sendaktepa ajanga, data protection law maliba tensa ka nung, iba amala temzüng yagi pei temeden meimbanga meyuteti raksatsütsü aser lokti nung pei temeden tongtibangsa 'right to vote' mamshitetsüsa akümtsü akok, ta pai ashi..

"Taoba mapang nunga tanga government registries talisa MGNREGA aser PDS indang

database agientsü (clean up) merangba maparen nung amshiba nguogo," ta Bordoloi züluba shidi nung shia lir.

Bordoloi-i ashiba agi, "Iba temzüng ya constitution anema inyakba maparen lir" aser "electoral system nung electoral democracy aser voter tem lendongbang nung toktsür."

India nung democracy kümzüksü asoshi benokba bill ya tangsa agientsüla, ta pai takhangba agütsü.

Iba bill anema opposition party nungi tashishiba balala aruaka, Hombarnü Centre-i voter ID aser Aadhaar cards sendakteptsü asoshi Election Laws (Amendment Bill) 2021 agizükogo.

Iba Bill agizükba ajanga sensopurtem indang fundamental rights raksatsütsü ta Opposition MPs nungi telangzüba balala agütsüba mapang, Union law minister Rijiju-i item o magizük.

Iba Bill agizükba mapang Rijiju-i, vote talila aser ochimashiba inyakim nokdangtsü asoshi iba Amendment temzüng kübok bener aiter ta jangjatsü.

Manipur Assembly election atema DC & SP tem renemtsü tuyur

Imphal, December 20, 2021 (Agencies): Election Commission-i Manipur kübok district ajak nungi deputy commissioner (DC) aser Superintendent of Police (SP) ajak dang Assembly elections atema renemtsü tetuyuba agütsüogo.

"Assembly election tiptema agitsü atema DC aser SP ajaki pei pei district atema election management plan yangluang" ta Manipur chief electoral officer (CEO) Rajesh Agarwal-i ashi.

Sangküm Assembly election agitsü aliba atema DC aser SP tem den senden ka amendang Manipur CEO-i iba tetuyuba agütsü.

Sangküm January ita Election Commission of India

(ECI) telok kati Manipur semdangtsü akok ta Agarwal-isa ashi.

March 19, 2022 tashi nung election maparen ajak tembangtsü ta Manipur CEO-isa shisem.

"State nung Assembly election agitsü mapang tashi nung maparen ajak renemer alitsüla" ta paisa metetdaksü.

Külen, law & order atema nodal officer Manipur additional DGP - L Kailun-ia state nung aser talisa election mapang tensa süngjema ayutsüba atema ashi.

Manipur nung political party balala tsüngda mangatettep adoka raraba aziüktsü atema Kailun-isa ketdangsurtem nem tetuyuba agütsü.

Mizoram nung lungkak aitba noktanger

Aizawl, December 20, 2021 (Agencies): Mizoram state health department kübok mapa inyakertemi COVID-19 wara mapang lungkak aitba noktanger ta sorkari metetdaksüogo.

National Health Mission nung contractual employees aser staff-i regularisation aser regular pay takhangba agüja lungkak aitba mapang ka nung state sorkari iba tenokdangba agütsü.

"Mizoram Essential Services Maintenance Act, 1990 nung lateta aliba ama wara mapang health and family welfare department nung mapa inyakertemi shingai lungkak aitba sentong magitsü" ta health department-i sangdong ka nung metetdaksü.

Mizoram nung COVID-19 kanga menateper aser iba ajanga nisungtem temolung mesüngjemdaksür aser aika asür, ta parnoki ashi.

COVID-19 indang Omicron variant adokba ajanga wara talila moudaksüi noktangtsü

atema mapa inyaktsüla. Anungji health department kübok mapa inyakertemi health care service delivery nung timtem ajurutsü. COVID-19 dak sendakba nung dang masü saka tanga tashidak agi shirangertema tetsükdaksü ajurutsü, ta health department-isa metetdaksü.

Deobar aonung 7:00 ako nungi iba tenokdangba ya ita trok atema alitsü.

National Health Mission nung contractual employees aser staff noklang aikati December 17, 2021 nungi mapang telatet makai lungkak aitsü tenzükogo.

Parnok state health department kübok regular employees ama shimoktsü takhangba agütsür aser itasen mapang shitak nung mangur ta ashir.

Ajisüaka, National Health Mission ketdangsur kati ashiba agibo November ita tashi itasen agütsüogo.

Traffic ozüng nung aibelener nem Gamusa agütsü

Guwahati, December 20, 2021 (Agencies): Kamrup District nung police-i mera balaka agia traffic ozüng nung aibelener dang senchi achitsü melena parnok nem Gamusa agütsü.

Tesüiba hopta ishika tsüngda, police-i traffic ozüng anema inyakertem kanga sashia mita liasü aser iba amala inyakim nokdangtsü atema drives balala achaayanga agiogo.

Traffic ozüng nung aibelenba rongnung, motorcycle anirtemi helmet meinoki senzüba tebilemsü ya tulutiba liasü aser motorcycle anirtem dang helmet inoktsü asoshi campaign den awareness sentong balala agi yonga, nüburtemi maneni aibelenba liasü.

Assam State nung helmet inoker motorcycle anitsü ajungmesotsü aser

tekümdangtsü agütsütsü asoshi tesüiba hopta ishika nungi Assam Police-i campaign tulu tenzüka agidar.

Aibelener dang senchi achiba nungi sen lakh aika sarutet, saka nüburtemi maneni aibelenba liasü.

Aibelener tem aziüktsü asoshi, Kamrup district indang Baihata Chariali nung police temi asalentong balala atongtet. Tang traffic ozüng nung aibelener nem police-i Gamusa lema agütsüba den helmet inoktsü asoshi mepishiogo.

Tawa, Assam Sorkari motorcycle anir aser tesülen amener anaprongla atema helmet inoktsü temzüng yangluogo.

Iba temzüng dak sendakba nung, traffic ozüng anema aibelenba maparen ajemdaksütsü asoshi police-i drive ka tenzükogo.

GOVERNMENT OF NAGALAND
OFFICE OF THE DIRECTOR GENERAL HOME GUARDS&CIVIL DEFENCE & STATE DISASTER RESPONSE FORCE
NAGALAND, KOHIMA.

NO.HG/Estt(A)-3/ 2021 **Dated Kohima, the th Dec' 2021**

ADVERTISEMENT

In pursuance to OM NO.AR-5/ASSO/98 (VOL-1) Dated 16/7/2021 and AR-3/GEN-174/2007(pt) dated 17/11/2021, applications are hereby invited from bona fide indigenous inhabitants of Nagaland for filling up the under mentioned post under the Director General Home Guards, Civil Defence & SDRF Nagaland, Kohima in the manner prescribed below:-

Sl.no	Name of post	No.of vacancy	Educational qualification	Pay Matrix
1	Sub. Inspector	2 (two) post	Bachelor's Degree.	Matrix level-8
2	Instructor Havildar	5 (five)post	Bachelor's Degree for General & PU passed for BT	Matrix level-5
3	Driver	3 (three) post	Class-VIII Passed with valid Driving Licence.	Matrix level-3

Age limits

- Minimum -21 years & Maximum-30 years. The upper age is relaxable by 5(five) years for ST, and 5 (five) years for Govt. employees who have rendered not less than 3 (three) years of continuous service.
- As per P& AR No.AR-5/ASSO/98(Vol-1) dated 16/7/2021, there shall be relaxation of age for entry government service for a period of 1(one) year with effect from 22nd April 2020.
- Reservation of post shall be as per the existing reservation policy of the Government of Nagaland.
- Candidates should furnish self-attested Xerox copies of educational certificate, Indigenous certificate, Schedule Tribe Certificate, Backward certificate & Unemployment certificate along with the application.
- The application with required certificates/documents should be submitted to Director General Home Guards, Civil Defence & SDRF Nagaland Kohima during office hours from the date of publication. Application will be summarily rejected if any of the above certificates/documents are incomplete/tampered or forged. Serving Government employees applying for the post should submit NOC issued by concern HOD.
- Candidates shortlisted for the posts for viva-voce are required to produce original documents/certificates.
- Mode of selection:
 - For Sl.no 1 & 2 Medical test, Physical test, written test and oral (for those passing Medical test, physical test & written test)
 - (c) For Sl.no 3 Driving test, driving related skills and knowledge including use of aids like Google maps etc. for driving & Interview.
- Application sent through Post/Email or any other Electronic means shall not be accepted.
- Applications submitted earlier would have to be re-submitted in the required format, mentioning this advertisement number.
- Last date for submission of application will be 31/01/2022 during office hours and no applications shall be entertained after the closing date.
- Application form can be downloaded from the department website www.hgcd.nagaland.gov.in.w.e.f the date of publication.
- No TA/DA shall be admissible to the candidates for appearing for the examination etc.
- The date, time & venue of the examination will be intimated in all local dailies in due course of time.
- No separate call letters shall be issued to the candidates.

Sd/-
(RUPIN SHARMA), IPS
Director General.

Issued by DIPR



TIR YIMYIM YIMOBILEM (EDITORIAL)

DIMAPUR SANGTENNÜ, LUCHII (DECEMBER) 21, 2021

Nisung mali ayimba tayimtsü

Asenoki metetmeteta alima aienba tamaitüsü kaji, joko, asen lima nunga nisung medeni ayimba tayimtsü 'drone' ajanga tesem ka nungi kati mozü belentsü tenzükba ya asütsü. Iba maparen yagi nungdak osettem tongtsü dang mapang aser senotsü kümzükba dang masü saka nisung taküm aika tasütsüba lendong tashi nungia kümzüksü. Asen lima nung balaka, gari lenmang onsara majung, anungji tangalen ghonda ka nung atongtsüba lenmang nung asenokbo ghonda ana nunga matonger. Ibaji dang masü, lenmang onsara majungba agi gari raksaba nung senotsü talila endokba dang masü saka anema alirtem dena temang raksar tadongtsü ka atongdangbo shirangadoker. Aji oda, asenok lenmang nungbo shiranger bener jajatsülabo masü, kanga lendong timtem aketba lenmang kümogo. Iba jagi, takokerbo helicopter nungang senzüba asenoki angashir. Ajisüaka, sensakertem asoshibo koda masü shirangyonga helicopter nung senzütsüabajibo tamakoktsü, anungji anepalur aliyonga maliyonga aser mozü anguyonga manguyonga, pei alidak government mozü kidang amongtsüsa akümer. Ano, tang ama, alima wara agi atongdang tesem ajak nungbo tashidak tendangdak maka, anungji tangaleni bener yoker. Iba jagi, mapang shitak nung tetendangba osang mangu, nübortem timtemba asenoki taoba küm aiben ajangshiogo. Atangji, asenoka tangar ama alima nung nisungtem nungdak bushiteta agütsütetsüsa shisatsü bushitsü melen, asenokbo mapa meinyaki takar akümtsü merangba ajanga, tangar anünglak nung alitsü merang dang, asenok alilen ak den kasasa kümer lishi aser auyi melanga kazütepba ya jungjunga bilemdangra, temenünütsüka, tejashitsüka aser temeimtsüka lir. Asenok yamai lia, tangarbo office nung dang masü saka kidang aser alu mapa inyadok ajak nung computer agi yangluba nisung 'robot' nem dang mapa inyadoktsüba asenoki angutsü. Ibaji asenok asoshi tayongzükba kümdaytsü, asenok tang Mokokchung nungi Longsa aser Tuensang mozü kidang amshitsü atema drone ajanga mozü aser nungdak osettem bener yok tenzükbaji tetenzüker ser, alilen aser anünglen ajak nung tangar den kasasa tejakleni aotsü merangteptsübaji, talisa, lanurtem asoshi teinyaktsü rongdak nungdak kümogo. Joko, Mokokchung nungi drone ajanga Tuensang nung mozü tongtsütsüabajibo mapang minute 26 dang agir, aji koda tepelatsü osang tajung lir. Iba kasa mozüji alilen gari nung Mokokchung nungi Tuensangi bener ao nungbo, lenmang majungba agi, kodang atongtsüar memetetka bener jajatsü. Tanübo, mozü ishika bener yok tenzükba otsü jembir saka asung asenoki repranga lia asenok nungdakba oset aser chiyongtsü tashi alilen gari nung masü saka anungdak drone tayimtsü ajanga asen yim tashi bentsür aruba asenoki angutsü. Joko, alima rara nunga, akhi ama tayimtsü nung nisung mener oa bomb ajungoktsü masü saka nisung mali ser ayimba tayimtsü drone nung dang bomb oshia bener oa ajungoktsü, aji tetsübuttsüka lir. Alima nung nisung tashitemeteti iba tashiji kümdayi. Iba ama putu nung asenokbo vote dang yoka taküm alitsü merangtsü na? Iba ama putu nung asenokbo commission aser percentage agiba agidang takar akümtsü merangtsü na? Tangar nisung mali ser tayimtsü nung oset bener yoktettsüsa yanglutetba o asenok tiyazü bill yanglur sen agizüka kibong mesütsü merangba na tetsüngdaji kopiga asütsü? Asenok yamai lia, ano tangarbo alilena nisungi masü saka computer ajanga pasasa anir aoba gari adoktsü? Joko, tanü putu yabo ochimashi mapatem agi alilen akatsü merangba putu masü saka pei kolok aser aser pei teka agi inyaktetba ochi rongsen aser shisatsü agi anungdak alitsü kimong bushiba mapang lir. Ibai mapai mao ita sen chia kazüba putu to masü saka shisatsü tasen bushiloka mapa meranga inyakba putu lir. Atangji, asenoki sen dang bilemer aser sen dang bushir, iba jagi asenok ajak sen lar kümogo. Ajisüaka, ibai sen masü shisatsü bushiba putu lir. Asenoki sen dang bushiba agi asenok ajak auer aser ashir ama akümer aser pei nungdak meperiteter. Ajisüaka, kodang asenoki shisatsü bushi tenzükdir, idangjibo asenoki asen kisung asoshi dang masü saka nübortem asoshi dena rongsen agir magima poktetdaksütsü. Asenoki shisatsü bushitsü melen asen aküm aser temeten dena sen yong ayoktsü merangba agi, tangarbo nisung maden ser nungdak ajak tonga tayimtsü yimzüdaksü dang, asenokbo alilena junga mejajatetsüsa asenoksasa asenok ochimashiba mapatem agi tenük pokdaksüogo. Iba shisa tenük apokba yabo ochi shisatsü agi dang lapoktettsü.

OLEMSABANG

Arogo aser Lokti nung Mokokminertem Jenjang

~ Maong Jamir

(Yashi adok nungi...)

Polio tashidak keter asoba nisung kati yamai shia lir "Ni jaja moteter, saka kü taküm nung kecha tesasaba mali, kechiyong ni inyaktetba mapa jenti lir. Saka nübortem ni kechi inyakteter iba indang masü, saka ni meinyaktetba indang dang jembir". Anungji item nübortem dak kechi tajung ali ibaji asenoki züngshidi aser lokti asoshi amshidi.

Arogo nung Mokokminertem

Arogo ka nung takar aser sensaker, tulur aser tilar, tetsür aser tebur, tanur aser tain, tazünger aser mazünger, anema alir aser manemi alir, abensaa alir aser mokokminertem ajak lir. Parnok ajak Khrista meyong "Yihuda nungera masü Grik nungera masü, alara masü nüchia masü, tebura masü, tetsüra masü, kechiyong nenok ajak Khrista Yisu nung ka dang" (Galatia 3:28)

Saka tanü putu Khristar Arogo nung süoki ia mebilemdangba telok ka lir aser itemji "Mokokminertem" ya lir. Parnoka Tsüngremi yangluba aser Tsüngrem meyong. Saka parnoki 'mangaashitsü', 'mangatetsü', 'memetetsü', 'mangutsü', aser 'meshisadangtetsü' ta asenoki bilemer aser parnok dang Osangtajungji mashir. Anungji mokokminertem aika iba Osangtajung mangashii aser memeteti iba lima nungi pilaogo.

Asenoki Tanela Temeshi tashiji 'iba tashi ya dang' 'iba tashiji dang' (We can't limit the power of the Holy Spirit) ta ashitsü makok. Asenoki kodang parnok den jembidir, Tanela Temeshi ajanga parnok nem tangatetba agütsütsü. Ano Tsüngrem Osangtajung-ji jembiba agi dang masü saka mapa agi asenoki sangdongtsü akok. Tsüngrem osangji 'temiem' anungji temeim sayuba ajanga parnoki Yisu temeim indang angatetsü akok. Anungji Mokokminertem den Tsüngrem Oji mapa agi aser Arogoi temeim agi sangdongtsüla.

Arogo nung Pastor, Women Pastor, Youth Pastor, Child Pastor, Christian Education Director ta shima lir. Arogo ka nung nütsung 1000 ka nung Mokokminertem 10 mesüra 15 danga lira, parnok asoshia tesayur nungdaker. Kechiba süra parnok nisung 10-15-jia Tsüngrem tsüngdang senti ta angatetsüla. Kokra tanü telidak toklang tenzükertem 'Mokokminertem' anepalutsü asoshi training terabo agitsü nungdaker.

Anema aliba Arogo (Healthy Church) nung nütsung ajaki 'ni iba Arogo meyong' ta bilemer. Saka koba Arogo/lokti nung nisung kari pa/la iba Arogo meyong masü ama bilemra iba Arogoji 'Shiranga Aliba Arogo' (Unhealthy Church). Aser tanü putu nung 'Mokokminertem' aikati ni iba Arogo meyong ta bilemaa malitsüa akok.

Revival aser Youth Camp mapang asenoki Tsüngremer sayatenya mapa aika angur. Item sentong mapangtem dak alaka tanü asen Arogotemi Tsüngremer sayatenya majangshir, kechiba süra asenoki tashimaitbatem züngoka mali. Laishiba nung shia aliba ama "Kong tashimaitba lir yangji Tsüngremer tashi tali jungkai adoker" (2 Corinthians 12:9). Yamaji Tsüngremer sayatenya mapaji item Mokokminertemajanga asenoki anogo shia angutsü.

Tsüngremer sayatenya mapaji nüpkokeri angubaji dang masü; saka nüpkokeri munguaka pai/lai kechi inyakteter aji Tsüngremer sayatenya mapa ta angatetsüla. Aser Arogo teyari ajanga iba sayatenya mapaji asenoki angutsü.

Tanü asen tenyaba mapa nung mokokminertem dang masü, saka süoki ia mebilemba telok, züngtoka/jendoka yutsüba telok aika lir. Item nübortem asen tenyaba mapanung mezüngok tashi asenoki Tsüngremer sayatenya mapaji mongutetsü.

Kibong aika nung mokokminertem kinungertemia anir mesünzüner. Parnokia Christmas pelatepbaji experience asütsüla. Anungji 2019 küm Christmas atongtsü anasa gari nung parnok mokokminer pezü anir Christmas decoration tesem balala nung chiyungtsü chia ajia senzü. Ibaji dang masü An (chicken) angutsüba game nung parnok ajak saidaktsü aser tia kaa parnok kaka angu. Ano Christmas anogo atongtsü hapta anashi liasü, saka kidangi shilangdang parnok rongnung kati yamai ashi, "taküm Christmas-sa tajungba." - Nai mapa tilaka inyakba ajanga tepela sempet bener arutsür.

YSS züngsemtemi asen ABAM aser Arogotem dang mokokminertem anepaluba nung teinyaktsü kar lemsatepba yamai lemsateper:

1. Kokra ABAM nunga Mokokminertem atema ministry jurila tenzüktsüla. Iba ministry nung inyaktsü asoshi special training agir alir shimtsüla.
2. Mokokminertem alakteta anepalutsü asoshi Arogo nung Ministry balaka alitsüla. Tanü tashi nung iba ama Ministryji 'We Can' nungja agütsür Kohima Baptist Arogo nung tenzüka lir.
3. Mokokminertem dang masü saka tsürabur, adianu aser parnok yaritepertem den Arogo tenyaba mapa inyaktsüla.
4. Arogo nung toklang tenzükertem Mokokminertem den koma jembishinütsü, aser tali metetsü asoshi training terabo agitsüla, ibaji ajanga Arogo nung liromedema tenyaba mapa inyaktetsü.
5. Arogo nung Mokokminertem jenjang indang tangatetba agütsütsü asoshi shisadokten mapang shia akatsüla.
6. Mokokminertem nem vocational training agütsütsüla. Parnoka kenübo shinga daka memedaloki litetsüsa yanglutsütsü koka lir.
7. Tamsüa dang lira Mokokminertema Arogo nung toklang tenzükba mapa aser Deacon nung amshitsüla.
8. Ki atena moutetertem asoshi rongsen endok mesasai daycare centre yanglutsüla.
9. Tenlakiji Mokokminertema arutetsüsa aser satoksatoka arua mentetsüsa yanglutsüla. Tenla kidang Wheel Chair ayuba aser sentong balala nung Sign language amshiba ajanga Mokokminertem Arogo nung züngokba tali jangjatsür.
10. Arogoi iba ministry meinyaktetra shirnoki parnok anepalur item telokji Arogoi nungitsüla.

Mokokminertemi mangatetsü ta asenoki bilemer saka Mark Twain-i yamai shia lir "Taochi oshiji narongjaker-i angashir aser tenük tapoki-a angur"

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Karnataka state cabinet-i anti-conversion ozüng agizükogo



December ita tetenzüklen Bengaluru nung Khristantemi anti-conversion bill anema longkak aitba noksa nung angur.

Bengaluru, Luchii/ December 20 (Agencies): Hombarnü (December 20) Karnataka state Cabinet-i 'Karnataka Protection of Right to religion bill, 2021' agizükogo aser iba bill ya Mongolbarnü state assembly nunga benoktsü. Iba bill ya state nung tamangba yimsü meyipba nokdangtsü nükjidong nung benoker. Karnataka nung opposition Congress aser Khristantemibo iba ozüng anema nokdaker.

Karnataka assembly nung benoktsü aliba anti-conversion ozüng ya Uttar Pradesh nung benoka aliba anti-conversion ozüng den kanga mesükteper, ta osang angazüker.

Hombarnü Karnataka Chief Minister, Basavaraj Bommai-i, state nung nüburtem yimsü meyipdaksübaji BJP-i memelatsü, ta metetdaksü.

Vishwa Hindu Parishath (VHP)-i ayongzükba sentong ka nung jembidang Chief Minister-i, "Ozü sorkari kobi melii anti-conversion ozüngtem benoktsü. State tesem ajaklen tai maket nisungtem yimsü meyipdaksür. Sen aser senotsü teyari balala ajanga parnok

mesüzükdaksür," ta ashi. Paisa, "Tamangba yimsü meyipdaksübaji nütsüng timba kümdaktsüba onük ka dang masü. Tangatetba melenshitsu. Tang mesüzükdaksübaji ajanga tarutsü nungbo loktiliba mejungi kongshitsu. Ozü sorkar aser asen linüki ibaji memelatsü," ta ashi.

"Tamangba yimsü meyipdaksütsü atema mesüzükdaktsüba asoshi ozüng yanglua mali. Linük temzüng nunga iba indangji shia mali. Tang anti-conversion bill anema nokdakertemi (opposition) 2019 küm nungbo iba ozüng benoktsü renema liasü. Tangbo yimtenren dak sendakba nung parnoki iba bill anema ola adoktsüsa akümer," ta paisa metetdaksü.

Iba bill nung ajemdaker nütsüng ajema aliba minorities anema inyaktsü, ta aikati bilemer. Karnataka sorkari assembly nung iba bill ya agizüka ozüng kümra India nung anti-conversion ozüng agizükba state 9bubaji Karnataka asütsü.

Karnataka nung asükwa mongpu assembly senden

tenzüka sülen anti-conversion bill onük nung BJP sorkar aser opposition Congress na tsüngda mangatettep adoka lir. Hindu right-wing organisations-ia BJP sorkar dang taruba assembly senden nungsa anti conversion bill benoka agizüktsüla, ta takhangba agütsüogo.

"Tan assembly nung iba bill mebenokra onoki January 1 nungi tenzüka state tesem ajaklen longkak aittsü," ta Sri Ram Sene Tir, Pramod Mutalik-i metetdaksü.

Ano külen Kanataka state BJP-ia social media ajanga, "Anti-conversion ozüng anema Congress telung nunga mangatettep lir. Iba ozüng benokra kar melung yirutsü. Nenok atema Hindu nunger dang nungibo yimtenren nung tajangzük angutsüji tongtibangba," ta metetdaksü.

Rural Development & Panchayat Raj minister, KS Eshwarappa-ia, sorkari iba ozüng agizüktsü, anungji shingai ratamata malitsüla, saka taruba assembly nung asü sangküm assembly nung ang agizüktsüar memetet, ta metetdaksüogo.

China nung anogo 40 nü tsüngda Khristan 300 dak tema apu

December 20, 2021: China nung sorkar ketdangsertemi province balala nung anogo 40 nü tsüngda Khristan 300 dak tema puogo.

China nung Church of Almighty God (CAG) züngsem kanga renlokba mapang nung communist sorkar ketdangsertemi October ita tomten nungi November ita tashi nung Guangdong province kübok Dongguan, Shenzhen, Foshan aser Qingyuan yimtittem aser Guangxi Zhuang Autonomous Region kübok yimti balala nungi Khristan 300 dak tema puogo, ta Bitter Winter-i metetdaksü.

Osangbener den jembidang police officer kati, China nung

CAG züngsem aika apuyonga tesem balala nung CAG züngsem timba-timba akümer, ta metetdaksü.

October 26 nü police ketdangsertemi CAG züngsem ka meyong ki mita aoba mapang nung laptop ka den yuan sen 100,000 apu. Kidang pa malibayong police-i pa kinüngtsü aser tanurtem puer oa liasü saka tesülen chiokogo.

November 17 nüa police-i CAG züngsem ka mita aoba mapang kidang alir nisung pongu apu.

Guangdong province nunga ketdangsertemi yimtsüngtem nung committees dang CAG züngsem ajak ki mita aotsü tuyua liasü. October ita nung

Gaozhou county nunga police-i ki ajak mita oa CAG züngsemtem pua liasü.

November ita tomten Guangxi Zhuang Autonomous Region nung CAG lenirtem aser züngsem aika apu, aser tang tashi parnok kong aliar mejangjar.

Henan province kübok Pingdingshan yimti nunga police-i CAG züngsem 59 apu aser nisung 200 dak tema merenshia liasü.

Church of Almighty God ya China nung 1991 küm tenzüka liasü aser tangbo CAG züngsem million 3-4 shi lir ta bilemer. Ajsüüka Khristan denomination balalaiba iba telok tesayuba ya kanga ashishir.

ANO GO ABEN TSÜNGREM DEN

Ochi Metettsü

"A-aka meli-i teinyaker ka küma ochi oji timi amshia Tsüngrem tsüngdang agizükttetsüsa ne sasa bendanga agüjang." 2 Timoti 2:15

Alima nung tajung aser tamajung, ochi aser tiyazü temeim aser tesempatep ajak meyoktepa lir. Item tebendang metettsü asenok meimchir nem Tsüngremi tashi agüja lir. Asenok aliba lokti nunga item temeyoktep yimya angutsü. Nisung ajaki tajung, ochi aser temeim shimteta amshi nung Tsüngrem koda sentsüwangshitsu!

Tenyar Pauli asangur Timothy tasü ita ochi nung nübur anitsü ajungshi kechiyong parnok rongnung Humenia aser Fileta tamang nungi pila or nübur mashileni ania liasü.

Tsüngrem O koba ochi o lir, metettsü aser tasü ita teinyaker ka asütsü nungdaker. Metongshtisütsü, tarütsütsü temeshiba nung altisü sayutsüji Tsüngrem ochi O nung angur. Temulung ajak agi bendanga bushira Tsüngremi asenok ochi meteter aser ochi amshir kümdaktsütsü. Aser nenoki ochiji metettsü aser ochi jagi nenok nüchi kümdaktsütsü. Yohan 8:32

SARASADEM:

Temeim Tsüngrem ni tasütait, ochi meteter aser bendanga agütsür südakjangma. Amen
Laishiba küm ka nung: Isaia 10-13, J Adok 6

England aser Wales nung Khristan nütsüng kanga ajema kümogo

December 20, 2021: England aser Wales na nung Khristan nütsüng kanga ajema kümogo; National Statistics office data nung ajemdaker Khristan nütsüng ajema akümbaji asadanga liasü.

2019 data nung shia aliba agi, England aser Wales nung nütsüng shilem 51 dang Khristantem liasü aser yimsü kecha mamanger shilem 30 dak tema liasü.

2011 Census nungbo England aser Wales nung nütsüng shilem 59 Khristantem liasü.

Khristan nütsüng tajemba akümyonga mamangertem nütsüngbo timba akümer; 2011 küm tamangba yimsü kecha mamanger nütsüng shilem 32.3 kecha mamanger nütsüng shilem 38.4 kümogo.

Khristan nütsüng rongnung tajembaji arrshi küm 20 nungi 29 lanurtem shilem 35.2 aser arrshi küm 30 nungi 39 lanurtem shilem 39.8 lir.

Ano nütsüng rongnung arrshi küm 60 nungi 69 pur shilem 65 shi Khristan lir, arrshi küm 70 nungi 79 purtem shilem 74.6 aser arrshi küm 80 ser temapur shilem 81 shi Khristantem lir.

Iba denji medandangra arrshi küm 20 nungi 29 pur lanur shilem 53.4-i tamangba yimsü kecha mamanger aser arrshi

küm 30 nungi 39 purtem shilem 46.3-i yimsü kecha mamanger.

England aser Wales nung Muslim nütsüng tera renlokogo. 2011 küm nütsüng shilem 4.83 Muslim nungertem liasü saka tangbo shilem 5.67 kümogo.

2021 Census sangküm sangdongtsü aser iba mapang nungjibo ano Khristan nütsüng kanga ajemer alitsüa akok, ta bilemer.

Yaküm October ita nung Church of England nung Tenla kitem nung tekülem sentong nung adentsü atema arurtem shilem 57 agi ishiba liasü.

2019 küm den medemdangra 2020 küm tekülem kidangi arurtem shilem 7 agi tajemba aküm.

Tesüiba küm aika Church of England nung Tenla kidangi arurtem tajemba-tajemba akümer.

Arogo nung nütsüng arentsü, talisa lanurtem ayongdentsü atema tan ita Arogoi nütsüngsüba projects (Church of England's Vision & Strategy projects) nung pound sen million 5 dak tema indoktsü, ta metetdaksüogo.

Church of England's Vision & Strategy Co-Director, Debbie Clinton-i, "Taruba küm ter tsüngda asalentong yanglua lanurtem dak rangloker Arogo yangertsüji Church of England atema tongtibangba kümogo," ta metetdaksü.

OLONG PAITEP # 6033

1			2					3		
4							5			
						6				
			7							8
		9								
							10			
11						12				
13										

TIPIEN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 6032 TELANGZÜBA

TIPIEN :		LANGTSÜNGLEN :	
1. Yimlibilem, 4. Anak, 5. Tangar,		1. Yongya, 2. Moko, 3. Marok,	
7. Aya, 8. Arong, 11. Par, 13. Lemjem,		5. Teronem, 6. Nung, 8. Amajok,	
14. Oagi, 15. Mulung.		9. Jangzü, 10. belem, 12. Rong.	



ALOKBA TEZÜREP TIA :
Alokba aonungshi ayaterm nungdang yi agi longdaka meseper shilangdang kinungtsü Waraklai azü-ak jalokjaa atakli tasa aruba agi kibong tiaji tamajungba akümba ngua lar medemtsüri tasa ka ashir.
Medemtsür : Atongtsü, nai tasa ka melenshia taonung nungibo nü kinungbu yi jemer shilangdangji o tanep jembia mesüzüka, pa tsüngsem mojaji semzüka, oda pa dakji tera azüshia anepaludangangma, oda temelenshi kar danga lira temoatsüato.
Warakla : Haija atong, ni yamaji inyakdangdino? (Paonungjia Alokba to kasa yi jemer aruagi ki lashidang Warakla to ki lapoka alur kanga anepalua, medemtsürlai ashiba ajak to inyak tashi nung Alokbai ashir.)
Alokba : Haeet, darling ni kidangi shilang asübo azü-ak Warakla toagi atakatema alitsüba nai ni yamai anepaluba atema Thanks.
Warakla : Kechi Thinks! Methinks ati Azüba!
 Lilir : WhatsApp

TANÜBO NAI LANGZÜANG

Q. Columbia Journalism School ajanga India nunger journalist koba nem 2022 alumni award naroküm agütsü?
 [A] N Ram [B] Malini Parthasarathy
 [C] Raja Mohan [D] Soli J. Sorabjee (Taruba adok nung onoki langzüksü)
YASHI ADOK TELANGZÜBA : India

AO OSHI ANGAZÜKDAK:
TANÜ ANGAZÜKTSÜBA OJANG

Lokti
 (n) nisung aika külemi adenshiba (multitude)
 * Yisu sülen **lokti** tulu anidak.

Loktiliba
 (n) nisungtem telok küma külemi lia aoba (social life)
 * **Loktiliba** nung kati ka yaritepa alitsü nungdaker.

NAI-A YA METETTER MA

BALLON D'OR TIMBA ANGURTEM:

* **Tebur**

- Lionel Messi (Argentina)	7	(2009,2010,2011,2012,2015, 2019, 2021)
- Cristiano Ronaldo (Portugal)	5	(2008,2013,2014,2016, 2017)
- Michel Platini (France)	3	(1983,1984,1985)
- Johan Cruyff (Netherlands)	3	(1971,1973,1974)
- Marco van Basten (Netherlands)	3	(1988,1989,1992)
- Franz Beckenbauer (Germany)	2	(1972,1976)
- Ronaldo (Brazil)	2	(1997,2002)
- Alfredo di Stéfano (Argentina/Spain/Colombia)	2	(1957,1959)
- Kevin Keegan (England)	2	(1978,1979)
- Karl-Heinz Rummenigge (Germany)	2	(1980,1981)

* **Tetsür**

- Ada Hegerberg (Norway)	1	(2018)
- Megan Rapinoe (USA)	1	(2019)
- Alexia Putellas (Spain)	1	(2021)

SUDOKU # 6073 **TELANGZUBA # 6072**

	3	5			6	2	9	1		8	3	4	7	2	5	1	9	6
		4			2		5	8		5	6	7	3	1	9	8	4	2
2	6		1	5				7		1	9	2	4	6	8	7	5	3
					4	3		5		9	2	6	1	3	7	5	8	4
7							4	2		4	1	3	8	5	6	2	7	9
		8	5	3	7			9		7	8	5	2	9	4	3	6	1
5	2	6	8				1			6	4	1	5	7	2	9	3	8
			7	4						3	5	8	9	4	1	6	2	7
3	4			1	5	9	8	6		2	7	9	6	8	3	4	1	5

OJANG LUTEP # 5619

HOCI :

AMPA :

AK :

AÜTSITSÜ :

HIASOS :

YAZTIÜ :

LIKU :

KAAI :

NEBER :

URAR :

OJANG LUTEP TELANGZÜBA # 5618

SAYATENYA AJANGA MANGDANG MATALOKTSÜ SAKA BENDANGA AGÜTSÜR MERANGA INYAKTSÜ NÜNGDAKER

TAN HOPTA ATEMA - KOMA SÜLA ?

Q. Nagaland government nung tatar yimsüsürtem ya Naga National Workers o India Government na tsüngda o tongdar aser teyariteper dang masü saka Naga yimten tebilemstü ken o tembangtsü atema, India den tongti shilem agia Naga yimten ken o süoka jembir aküm nunga koma süla ?



New Delhi, December 20, 2021: Panama papers ken o dak sendakba nung Hombarnü Bollywood actress, Aishwarya Rai, Enforcement Directorate (ED) office-i jaokba ama la aoba sülen osangbenertem office kima ataba noksa nung angur.

PM Modi-i Asia linük pongu nungi foreign minister tem ajuru

New Delhi, Luchii/December 20 (Agencies): Central Asia nung aliba linük pongu-Kazakhstan, Kyrgyz Republic, Tajikistan, Turkmenistan aser Uzbekistan linüktem nungi Foreign Minister temi Hombarnü India Ato kilonser, Narendra Modi ajuru aser parnoki India den tesendaktep tajungba akümtsü atema melunga lir, ta metetdaksü.

Ato kilonser, Modi-ia India-i mapang talangka nungi Central Asia linüktem den tesendaktep tajung ayuba lemsatep aser item linük ya 'Extended Neighbourhood' lir, ta ashi.

Modi-isa India aser Central Asia nung aliba linüktem tsüingda rongsenketsüing tsütsü taliba amalitepa inyaktüsü maongka aika lir, aser iba atemaji lenmang ajanga sendakteptsüji

kanga tongtibang, ta ashi.

2015 küm pai Central Asia linüktem ajak semdangba aser maneni Kazakhstan, Uzbekistan aser Kyrgyz Republic semdangba bilemteta pai, India aser Central Asia tsüingda sobaliba aser nüburtem tsüingda tesendaktep tajung ayutsü tongtibang, ta ashi.

Central Asia linüktem nungi Foreign Minister tem tang New Delhi nung lir. Parnoki India-Central Asia Dialogue tasembuba senden nung shilem agia liasü.

Senden tembangba sülen PMO sangdong ka ajanga, "Foreign Minister temi Tirtemi Ato kilonser Modi den salem lemsatepba metetdaksü aser lenirtemi India den tesendaktep tajung yunüba lemsatepa liasü," ta metetdaksü.

Modi-i Foreign Minister tem ajuruba senden nungji External Affairs Minister, S Jaishankar aser National Security Adviser, Ajit Doval nata densema liasü.

Foreign Minister temi India-Central Asia Dialogue senden nung jembiba onüktem Modi nem-a metetdaksü. Amongnü External Affairs Minister Jaishankar leniba nung iba senden mena liasü.

India-Central Asia Dialogue senden nungji shishilembaba aser connectivity, terenlok tsütsü partnership aser Afghanistan tensa densema region nung tatalokbatem indang jembiba liasü.

India-Central Asia Dialogue senden nungsa India aser Central Asian linüktem tsüingda tesendaktep tajung aliba bangjema liasü.

Lok Sabha nung Election Laws (Amendment) Bill agizükogo

New Delhi, Luchii/December 20 (Agencies): Hombarnü Lok Sabha senden nung opposition züingsemtemi Lakhimpur Kheri nung tatalokba ken o dak sendakba nung longkak aitba mapang nung Election Laws (Amendment) Bill 2021 agizükogo; iba bill agizükba ajanga electoral roll data aser Aadhaar eco system na sendakteptsü.

Lok Sabha nung Law Minister, Kiren Rijiju-i Election Laws (Amendment) Bill 2021 benokba sülen iba bill atema mapang tatsüka o lemtep aser voice vote ajanga iba bill agizük.

Opposition züingsem karibo iba bill ya jungjunga asadangsü atema Parliamentary panel ka nem tama agütsüsüla, ta takhangba agüja liasü.

Opposition-i akhangbaji magizüki Kiren Rijiju-i, iba bill nung Standing Committee of Law & Personnel-i benokba onük aika densema lir, aser iba bill ya ajanga election agiba inyakyim merüktettsü, ta ashi.

Iba bill ajanga electoral rolls aser Aadhaar number sendakteptsü; iba bill ajanga voters ka maitsü atema züingya 12 aliba aadhaar number meshitsü asoshi electoral

registration officers nem temelaba agütsür.

Nisung ka tenüing constituency ka nung aiben zülüoka aliba mesüra constituency balala nung kasa tenüing zülüoka aliba mita reprangtsü atema tang electoral roll nung tenüing alirtem dang-a Aadhaar number meshitsü. Kasa bill ajangasa electoral roll nung tenüing zülüoktsü atema mepishiba ajak agizüktsü aser nisung kati Aadhaar number magütsüetba ajanga electoral roll nung aliba tenüing indoktsü memelatsü saka tanga kuli kakettem meshitsü.



Karad, December 20, 2021: Mongolbarnü Maharashtra Gram Panchayat elections agitsü lia Hombarnü Karad nung Polling ketdangsertemi distribution centre ka nungi Electronic Voting Machines (EVM) agizükba sülen reprangdangba noksa nung angur.

Omicron variant anema raratsü atema India renema lir: Mandaviya

New Delhi, December 20 (Agencies): Coronavirus Omicron variant anema raratsü atema India renema lir, aser taruba ita ana tashi ita ka nung coronavirus vaccine dose crore 45 tashi yanglutsü, ta Hombarnü Rajya Sabha senden nung Health & Family Welfare Minister, Mansukh Mandaviya-i metetdaksü.

Koda masüba tensa atema mozü aser oxygen renema lir aser ventilators 48,000 state tem nem lema agütsüogo, ta Union Minister-isa metetdaksü.

India nung Covid-19 vaccinations dak sendakba nung Mandaviya-i, linük nung vaccine agitsü temsüa alir tain nütsüing shilem 88-i vaccine mezüingbuba dose agiogo aser iba nungjagi shilem 58-ibo dose anaprongla agiogo, ta metetdaksü.

Rajya Sabha nung coronavirus Omicron variant atema o lemtepba mapang

nung Minister-i, World Health Organisation (WHO)-i iba variant ya tebilemtsü akaba variant ka lir, ta sangdongogo, aser sorkaria iba tensa junga mita reprangdar, ta metetdaksü.

Iba variant ya alima tesem balala nung prokdar, ta shia Mandaviya-i, tang tashi nung asen linük nung nisung 161 dak Omicron variant putetogo aser sorkari iba variant nokdangtsü atema inyakdar, ta metetdaksü.

India sorkari 'risk' linüktem sangdongogo aser item linüktem nungi India tonga arurtem dak iba tashidak tendanger, iba sülen anogo tenet pei kija anogo tenet mongdaksüba sülen ano tanaben tendanger, ta Health Minister-isa metetdaksü.

India nung ita shia vaccine dose crore 31 yanglua aliba nungi taruba ita nungbo ita shia vaccine dose crore 45 yanglutsü, ta paisa metetdaksü.



December 20, 2021 anepdang New Delhi nung ki malirtemi sükseta kazüba noksa nung angur. Hombarnü Delhi tesem balala nung kanga mekongka liasü aser Safdarjung Observatory nungbo minimum temperature 3.2 degrees Celsius tashi alua liasü.

Opposition Front nung Congress tongtibang asütsü: Shashi Tharoor

Kolkata, December 20 (Agencies): Hombarnü Congress lenir tain aser MP, Shashi Tharoor-i, 2024 küm Lok Sabha election nung opposition front atema Congress ji tongtibang asütsü, aser BJP tamakok ngudaktsütsü atema TMC tongti lenir, Mamata Banerjee-i Congress aser tanga opposition party tem den longjemer inyaktüsüla, ta ashi.

Paisa, Lok Sabha election agitsü atema küm ana ser tesadang anünga lir, anungji 2024 küm BJP tamakok ngudaktsütsü atema opposition party temi tang nungi longjemer inyaktüsüla, ta ashi.

Rahul Gandhi dak lenisüba sempet mali, ta aikati jembiba dak sendakba nung Tharoor-i, mapang shia pai (Rahul) party atema shilem tajung agir aser Congress nung inyakertem timbakati pa Congress Tir inyakdaksüner, ta ashi.

Tharoor-i zülüba kaket 'Pride, Prejudice & Punditry' Kolkata nung sayaogo. Pa Kolkata nung aliba mapang

interview ka nung jembidang pai, "2024 küm opposition front sorkar atema Congress ji tongtibang asütsü," ta ashi.

Tawa West Bengal Chief Minister, Mamata Banerjee-i Congress party aija aruba dak sendakba nung Tharoor-i, West Bengal chief minister ya kanga tongtibang lenir ka lir aser lai Congress den longjemer inyaktüsü ni imlar, ta ashi.

"Ni Mamata kanga akhümtsübur. La UP nung minister inyakba mapang nungi ni la meteta liasü. La chief minister inyakba ni nguogo. La ya tongti lenir ka aser lai BJP anema-a takok tulu nguogo. Anungji lai Congress aser tanga opposition party tem den longjemer inyaktüsü, ta ni imlar," ta Tharoor-isa shisem.

"Ajisüaka election agitsü atema ano küm ana ser tesadang anünga lir, anungji tangsabo ajak bentettsü makok. Mapang agitsü, saka 2024 küm tashi nungbo ajak (opposition) longjemer inyaktüsüji kanga tongtibang," ta pai ashi.

Chile tir election nung Gabriel Boric-i takok nguogo



Santiago, Luchii/Dec. 20 (Agencies): Chile nung sorkar anema longkak aitba mapang nungtugu akumsang left-wing legislator ka linük nung taruba tir asütsü shimtetogo.

Polling station shilem 99 jungnüa nungi osang aruba nung Gabriel Boric-i vote shilem 56 shi nguteter liasü aser pa den toktepsang conservative nungi Jose Antonio Kast-i shilem 44 nguteta liasü.

Nübuyimba mapang kanga sashia toktepaka Kast-i kanga kera tamakok ajuruba agizüka Twitter nung pa den toktepsang nem tenügsang agütsüba noksa ka pai lemsatepa liasü.

Arishi küm 35 tain Boric ya Chile nung tir tanuputisang akumtsü.

Tir menden yutsütsü alisang Sebastian Pinera-i Boric den video conference ka mena ita asem transition mapang par sorkari yaritsü, ta shia liasü.

"Ni Chile nübur ajunga asoshi tir akumtsü. Timtem ajak

ajangeta len anitsü asoshi ni tajungtiba nung inyaktü," ta Boric-i Pinera den külemi television nung adokba mapang ashi.

Boric, shiba March ita tir menden agizütsü lir, pai Chile indang shishilempaba nung rangloker yangluba rongsenketzüing anema nokdak, koba agi küm aika rongsenketzüing kanga kera züina aotsü aliba nungi soita atu, ta aikati jembir.

Iba yongji 2019 küm sorkar anema nüburtemi ain adoka yimteren tsütsü progressive left tashi ita akum aser nisung ka kijai yimsü asüba mapang yangluba linük indang constitution tanaben yanglushia liasü.

Boric ya Chile far south tsütsü Punta Arenas nungi lir, aser pa ya kaketshir ka ama Santiago nung aliba University of Chile nung Federation of Students lenir ka liasü. Shisaliok tajungba aser talangba atema

Israel-i linük 10 nem tenokdangba agütsü

Jerusalem, Luchii/December 20 (Agencies): Israel Cabinet-i, health ketdangsurtem tetuyuba dak ajemdaker linük 10 nem senzusenpong dak sendakba nung tenokdangba agütsüogo, kong United States aser Canada densema lir. Covid-19 Omicron variant kanga kara prokshia aoba ajanga iba tenokdangba agütsüogo.

Tenokdangba agütsütsü asoshi Hombarnü Cabinet-i vote agiba sülen telemtetba agia liasü ta Israel Ato Kilonser Naftali Bennett office sandong ka ajanga metetdaksü.

United States nem tenokdangba agütsütsü asoshi telemtetba agiba ya tanga mapang nung kanga buluabo mataloker, saka alima ajunga nung iba variant tasenba kanga kara prokshia aoba den Israel nunga iba tashidak menar tali akümba ajanga iba telemtetba agi. Israel ya linüktem rongnung nüburtem nem vaccine timtiba agütsür aliba linük ka lir, saka tashidak maneni menatepyonga odar. Senzusenpong nung tenokdangba agütsüba ya Parliamentary committee-i iba telemtetba dak sendakba nung tatabangbuba temelaba agütsüba sülen Bodhbarnü ayaterem nungi tenzüksü imlar.

US aser Canada na Europe

nungi tanga linüktem den iba tenokdangba agütsüba küboki aitogo. Parnok ya travel red-list nung züngoksemogo aser item linüktem yagi Israel nung aotsü memelatsü aser item linüktem nungi arurtem ajak mapang tatakzük ka atema quarantine asütsü nungdaker.

Hombarnü tenokdangba agütsüba linüktem rongnung United States, Canada, Belgium, Germany, Hungary, Italy, Morocco, Portugal, Switzerland aser Turkey densema lir.

South Africa aser Botswanan nung scientist temi November ita tashidak tapu tasenba potetba sülen ita ka tsüngda linük 89-i prokshiaogo aser Omicron variant menatepba aoba jenjang ya tanga dang nungi tensashiba asüba ajanga Israel-i senzusenpong nung tenokdangba agütsütsü telemtetba agi. White House medical adviser Dr Anthony Fauci densema health tsütsü mongintemi iba variant yagi alima ajunga anokshitsütsü ta tibelemtsü kaa bilemba lemsatepogo.

"Taoba mapang ama linüktem mokdangabo mayutsü ta bilemer, ajisüaka iba ajanga asenok indang hospital system tawadkdak makai akümstü ana nung lir," ta Fauci-i iba hopta ABC den sensaksemba mapang ashi.

pai anir 2011 küm longkak aitba mapang nüburtemi pa meteta akum.

2014 küm pa arishi küm 30 majungdang lower-house legislator ka ama national Congress nung Magallanes region nungi dena liasü.

Taküm nübuyimba mapang General Augusto Pinochet-i 1973-1990 tsüngta yimsü asügang yangluba neoliberal economic model melenshitsu, lokti mapa tuluba inyaktü atema takar tetsüti dang saru timba meshitsu, bensaa amshiba anema raratsü aser lipajen wazüka ayutsü atema sentongtem tali ayongzüka agitsü, ta pai nangzüka liasü.

Taoba ita voting mezüngbuba round agiba mapang Boric dang nungi Kast ya points ana agi timba liasü saka vote timba mongutet. Anungji Boric den tsükteptsüsa akum. Kast yagi taoba military dictatorship bukumba otsü lir.

Boric-i pa amendak dak, Santiago alema oa yimdakyimtsüng tem nungia vote agütsürtem atsür aruteta election magidang opinion polls ajanga sayuba meyipja liasü.

Suu Kyi ken o angadangtsüba anogo atsülanger

Yangon, Luchii/December 20 (Agencies): Myanmar junta court kati Aung San Suu Kyi anema benoka aliba ken o angadangtsü aliba anogo Hombarnü atsülanger. Bendanglen nungi walkie talkies bener aru ta aitsür aliba ken o ya Hombarnü obendangtsü liasü, ta iba ken o jangjaa aliba source kati ashi.

February 1 nü military-i sorkar atsüngtokba sülen civilian lenir Suu Kyi ya sota yua lir.

Civilian sorkar atsüngtokba sülen linük ajunga nung nüburtemi longkak ait tenzüik aser iba mapang military-i tashiyim amshia parnok nokdangtsü merandang nisung 1300 dak tema tepsetogo aser nisung 11,000 dak tema puogo, ta local monitoring group kati ashi.

Arishi küm 76 tain Suu Kyi anema, la ket nung bendanglen nungi bener aruba walkie-talkies yua liasü ta shia ken o benokogo. La anema benoka aliba ken o tem rongnung iba ken o ya ka lir aser lai aibelen aliba ngutetra la taküm tepeyong tepuokdak ayutsü akok.

Ajisüaka Hombarnü angadangtsü aliba ken o ya

Obendangtemi December 27 nü angadangtsü thinentüsügo, ta kasa source-i ashi.

Iba ita tetenzüklen la küm pezü tepuokdak ayutsü obendang agütsüogo. Military anema nokdaksü ajungmesoba ken o nung la aija iba obendang agütsü, koba alima kintemi aitsüogo.

Obendang agütsüba sülen mapang tatsüka dang lir Junta tekolakba Min Aung Hlaing-i temerenshi küm ana dang kümstü aser ashiba agi, la linük yimtiba Naypyidaw nung lar ki toktsür aotsü memelai küm ana ya süitemdaksütsü.

Walkie-talkie ken o nung aibelen aliba ngutetra Suu Kyi küm asem tepuokdaka yoktsü. Coupe sülen army aser police temi lar ki meita aoba mapang ozüing alema bener aruba walkie-talkie nguteta liasü.

Ken o jangjaa alirtemi ashiba agi, ken o junga asadanga sülen lar ki mita aoertemi parnok ket nung search warrant maliasü ta nangzükba ngutetogo.

Maneni Suu Kyi dang masü saka la nem teyari agütsürtem aser lenirtem aika ita tsüngda tepuokdaka yoktsü atema obendang agütsüogo.

Hong Kong election nung Beijing busemertemi akok

Hong Kong, Luchii/Dec. 20 (Agencies): Hong Kong nung election ozüing ka atema China-i pangzüing ka renemba sülen iba yimti nung legislative assembly election mezüngbuba agiba nung Beijing busemer candidate tem timba sür takok ngua moderate aser independent tem madak takok nguogo. Beijing busemer temi dang iba yimti indang election nung shilem agitettsüsa ozüngtem melenshiba sülen Deobarnü election agiba nung Beijing sülen anidakba candidate temi menden timba nguteta liasü.

British hungeri China nem 1997 küm Hong Kong ya agütsüba sülen election agia aruba rongnung shilem agiba tajemtibaji Deobar election ya liasü, kong vote agütsütsü temsüa alir shilem 30.2 dang arua pei vote agütsü, ajisüaka Hong Kong

lenir Carrie Lam-iba iba election nung temolung süa liasü, ta Hombarnü osangbener senden ka nung ashi.

Vote agütsütsü tenüing zülüoka alir ya shilem 92.5 atong, ta lai ashi koba 2012 aser 2016 dang nungi kanga agi timba liasü. Iba mapang vote agütsür shilem 70 shi tenüing zülüoka liasü.

Tenüing zülüoka alirtem asoshi election ka nung vote agütsütsü temeden amshi ya pei molung lir, ta lai ashi.

Iba election nung vote agütsür nisung million 1.35 liasü. LegCo nung parnoki aginüba candidate tem maru südi, aser ibaji parnoki temelenshi aliba electoral system busemba ajanga alitsü amai bilemer, ta Lam-i yimti indang Legislative Council athishia ashi.

Iba ozüing tasenba kübok ozüing yanglutsüpur indang indanga shimtetba ya 35 nungi 20 dang kumdaksü, saka legislature menden yabo 70 dang aliba nungi 90 kumdaksü. Ozüing yanglurtem ya timba Beijing busemba telok temi shimteta legislature nung timba südaksü.

Candidate ajunga ya nomination masügang Beijing busemba committee ajanga shimteta liasü.

Opposition camp ajanga iba election ya aitsü aser democracy busemba party tulutiba, Democratic Party nungi candidate kata tenüing magütsü, koba 1997 küm sülen tang mezüngbuba alitsü.

Legislator 90 den inyaktü ya maneni jangratemtsü asütsü, kechiaser parnok tangatetba balala lir, ta Lam-i ashi.



Kuala Lumpur, Malaysia tezülen Shah Alam nung tzümetsüing agi mubanger aliba lenmang ka ajanga yangji alirtem aoba noksa nung angur. Malaysia yimtiba aser temeket tesemtem nung anogo asem dak tali tzünglu kanga sashia aruba anenba sülen tzümetsüing tamajungtiba adoka nisung meyrirjang aika taolen mali aliba Hombarnü ketdangsurtemi kumzükogo.

**Office of the
MONGSENYIMTI SENSO MUNG DANG**B.P.O MONGSENYIMTI.P.O. CHUCHUYIMLANG
DIST: MOKOKCHUNG NAGALAND-798614**TAKOK NÜNGSANG YIMYIM**

Tenendak lenla lenkong ajak nung temjena apetasong meketi pei ajemalua alima shisatsü renlokren nung bendanga agüja azüngba maong nguteta Dr. Aosenla Pongen (Wb. Nungshiakum aser Wt. Chubanaro lmti jala) ajanga 'Tourism Industry and its Economic Impact on the Economic Development of Nagaland - A Study' thesis takok nung renema Doctor of Philosophy meraket jenjang ngutetba tepelazüng Mongsenyimti sensosanger ajak meyonga takoker nem tenüngsang tulu MSM Mendendi ajanga lemsateper.

Lai ngutetba alima shisatsü aser Tsüngremer taochi nung lanu asensortem tabensaba shisa angazükdakja asen nübür tejakleni anitsü inti teimla mangdang.

Sd/-
(IMOTONG)
President, MSMSd/-
(OBANGONEN)
Secretary, MSM**61 BUBA
MONGSENYIMTI SENSO MUNG DANG
INTI SENDEN SENTONG**

Anogo : 28 December 2021

Mapang : 8:30 A.M

Tesentepdak : Longsapang

**KETDANGPURTEM :**

1. Mendenbuba : Wb. Imotong
2. Tezüür : Wb. Obangonen

SENYUR : Wb & Wt : Aosungit

Onük Jembir : Wb. K. Tsukti Jamir
Project Officer, R.D. Nagaland**SENTONGREN**

1. Menden : Ketdangpurtem
2. Lai Zünger Sarasademtsü : Wb. Linukyanger, Pastor
Mongsenyimti Baptist Arogo
3. Tetushi agütsüba Mapang :
4. Tenükmen O : Wb. Tongpang Ozüküm, Minister
PWD (Housing & Mechanical)
Govt. of Nagaland
5. Osangtem Agitsü : a. Village Council
b. School Management Committee
c. Mongsenyimti Kaketshir Telongjem
d. Sanen Luden
e. Sen O Tsü Bentet Luden
6. Onük : "Antah Khu"
7. Lokti O lemtep Mapang :
8. Tatem Sarasadem : Rev. Imtimpang, Pastor
Mongsenyimti Compound Baptist Arogo

----- Lula Sünemtsü -----

**4th Running Volleyball Trophy
(Under Nagaland)**

6th - 7th January 2022

Organised by: Lakhuni Sporting Club

Cash prizes : 1st Prize - Rs. 30,000/-
2nd Prize - Rs. 20,000/-**Individual prizes** : Best Player, Best Spiker,
Best Setter - Rs. 1000 each.**Registration fee - Rs. 2000/-****Last date for Registration - 4th January, 2022.****For more information contact:****7085586466 / 9366524265****Aoyimkum nung ali tasazük 68x68
ayoktsü lir. Contact: 9612069875****NPP-i Advent Christmas Charity sentong ayongzük**

Dimapur, Luchii/December 20, 2021 (TYO): Nübür dang temeim mapa sayutsü asoshi, Deobarnü (19.12.2021) State Parent Body teyari agia National People's Party, Nagaland State indang State Minority Cell (Non-Tribal)-i District Hospital, Dimapur nung Advent Christmas Charity Outreach sentong ka agia liasü, ta sangdong ajanga NPP Nagaland State-i metetdaksü.

Iba Outreach sentong agiba mapang, Minority Cell indang ketdangsür aser züngsem tem den State Ketdangsürtemi

nikongdang 2:00 ako meta District Hospital Dimapur semdang aser parnoki iba mozüki nung inyaker doctor aser nurse densema manemerthem aser Medical Fraternity indang züngsem nem Khristmas sempet 100 dak tema agüja liasü.

December tetenzüklen, NPP Nagaland State indang State Women Wing-i iba ama Advent Christmas Charity Outreach Programme ayongzükä liasü. Iba charity drive mapang, NPP State Women Wing indang ketdangsür aser züngsem temi

Peren District kübok Operation Salvage Rehabilitation Centre semdang aser parnoki iba centre nung alirtem nem jang-o-tzü (jang aser dal densema tanga chiyongtsütem) lema agütsü.

Maneni, kasa anogo (19.12.2021) Minority Cell indang ketdangsür aser züngsem temi Dimapur Railway Station nung meshimetsür/sensaker aser talidak mali yimdong nung alirtem nem chiyongtsü talep (food packet) 250 shi lema agütsüogo, ta kasa sangdong nung shia lir.

NSRLM-i anogo ana Job Mela ayongzük

Dimapur, Luchii/December 20, 2021: Nagaland State Rural Livelihoods Mission den Job Mela indang interview agirtem aser Nagaland Tool Room & Training Centre nung inyaker staff tem külemi tangokba noksa nung angur.

Dimapur, Luchii/December 20, 2021 (TYO): NSRLM-i December 17 aser 18, 2021 nü Dimapur nung Job Mela sentong ayonga agiogo. Nagaland State Rural Livelihoods Mission den sendaktepa alir Deen Dayal Upadhyaya Grameen Kaushalya Yojana centers nung trade balala nung training tagidak alirtem (trainees) atema iba sentong ayongzükä liasü, ta sangdong ajanga metetdaksü.

Mapa (Job) atema interview inyakyim achaayangtsü asoshi State team dang melatsü, DDU-GKY nung training agir alir lanur nem sabang ka agütsüba

den külemi training agir alir lanurtem indang pool nungi tetemjen candidate tem shimtsü asoshi iba Mela ayongzük.

Deen Dayal Upadhyaya Grameen Kaushalya Yojana (DDU-GKY) ya Ministry of Rural Development (MORD), Government of India indang skill training mapatong ka lir.

Yimtsüng nung alir arishi küm 15 nungi 35 tsüngda lanurtem nem maongka agütsütsü nükjidong yur DDU-GKY-i inyaker. Nagaland nung DDUGKY mapa küma inyaktsü atema Nagaland State Rural Livelihoods Mission (NSRLM) ya nodal agency lir.

Iba interview nung shilem

agir company rongnung Bengaluru Marriott Hotel Whitefield, JW Marriott Bengaluru Prestige Golfshire Resort & Spa., Aditya Birla Fashion & Retail Limited, Bangalore, Leela Hotel, Bangalore, Royal County, Dixcy Textiles Pvt. Ltd, Tirupur, Silvercrest Clothing Pvt. Ltd. Bangalore, Ethno Creations, Dimapur, Nagaland aser tanga company aika dena lir. Anogo ana tashi ayonga agiba Mela sentong nungi candidate 100 tema nem mapa maongka agütsü. Interview ya offline aser online mode nung achaayanga agiogo, ta kasa sangdong nung shia lir.

Chakhroma Public Organisation ajanga state sorkar dang pelar

Dimapur, Luchii/December 20, 2021 (TYO): Nagaland state kübok Chümoukedima aser Niuland ya district temeja tasen ana kümdaktsütsü asoshi December 18, 2021 senden nung lemtetba atema Chief Minister Neiphiu Rio-i anir state cabinet dang pelaba lemsateper

asir iba telemtetba pelashishia agizüker, ta Chakhroma Public Organisation (CPO) sangdong ka ajanga ashi. Lenmang lapoka iba ama telemtetba agiba atema onoki kodanga mamadoktsü, kechiaser iba ya ajanga district tasen ana nung aliba nübürtem

ajangzüktsü, koba Chakhroma nüburi mapang talangka nungi aginüa aliba ka liasü, ta ashi.

Ibai nübürtem tejangraba asangsang kümtsüba ka lir aser iba ya ajanga nübürtem tajungtiba nung amokbanga yimsü sütettsü, ta sangdong ajanga ashi.

NE Basketball Championship Mizoram & Assam nati kokogo



Dimapur, Luchii/December 20 (TYO): NE Zonal Senior Basketball Championship tatembangbuba anogo Mizoram-i tebur asaya aser Assam-i tetsür asaya kokogo. North East Zonal Championship ya national asayamung atema qualifier lir. Iba asayamung nung takok anguba team ana, 71 buba Senior National Championship nung asayatsü, koba Chennai nung 2022 kum January 23

nungi 30 tashi asayatsü. Mezüngbuba asaya nung Manipur team-i 126-33 agi Tripura madak takok ngua liasü. Tanabuba asaya nung Nagaland tebur team-i Meghalaya 70-73 agi akok. Iba asaya nung Nagaland team atema K. Belho-i point 29 aser Seyie Kire-i point 25 score asü. Meghalaya asoshia Vaiphie-ia point 18 score asü. Iba asaya akokba sülen Captain Salew

Kadete aser Vice Captain Chumben Humtsoe nati aniba Nagaland team iba asayamung tebur asaya nung tasembuba jenjang nung tembangogo.

Tanü tebur asaya tatembangbuba nung Mizoram team-i 85-68 agi Assam madak takok nguogo. National asayar Lalrina Renthlei-i anir Mizo nung asayartemi teti ama kanga kara asaya aser parnok temaba jenjang nung tembanga Chennai nung National asayamung atema qualify süogo.

Tetsür asaya final nung Assam team-i Meghalaya team ayong ayonga kokogo. Assamese tetsür team-i iba asaya 104-51 agi koka liasü.

NE Zonal Senior Basketball Championship shibangba sentong nung Minister of Food Civil Supplies & Consumer Affairs, Forest & Environment, Health & Family Welfare, Information & Public Relations, Law, Taxation, Registration & Stamps in Government of Meghalaya, James PK Sangma tongti tesemdanger liasü.

Nokdenlemba volleyball trophy sangküm Jan 18-20 asayatsü

Mokokchung, Dec 20 (TYO): Ao Kaketshir Mungdang (AKM)-i 4 buba Nokdenlemba Open Volleyball Trophy sangküm 18th Jan nungi 20th Jan 2022 tashi Multi Sports Complex, Mokokchung nung asayatsü lemtetogo, ta AKM sangdong ka ajanga metetdaksüogo.

Anungji, shilem agitsü jangraa aliertemi AKM office nungi registration form agizüksü asoshi AKM-isa metetdaksü.

Iba trophy shir teloki bendir parnok nem senpet sen lakh ka (Rs. 1, 00, 000/-), tanabuba jenjang nem meyi roker (Rs. 60,000/-) aser semi final tashi atonger nem meyi metsü-tsü

(Rs. 20,000/- each) aser iba den jurila/kija senpet balala sempetsütsü renema lir, ta parnokisa metetdaksü.

Telok kari danga iba asayamung dak sentakba nung osang tejangjaba metetnura iba number - 9089245711/8731049595 nung tongtepretepsü asoshi parnokisa shisem.

Juan Ferrando ATK Mohun Bagan nung adentsü renema lir



Luchii/December 20, 2021 (Agencies): FC Goa head coach Juan Ferrando ATK Mohun Bagan nung adentsü renema lir. Pa indang contract nung keta aliba clause ka benoktsü telemtetba agiba ajanga pa club toktsür aotsü temelaba agütsür.

FC Goa tir aser co-owner Akshay Tandon-i iba osang ya Deobarnü sangdonga liasü.

Arishi kum 40 tain coach ya ATK Mohun Bagan head coach mapang abentsü renema lir. ATK Mohun Bagan pur taküm ISL asayamung nung junga masayateti ponglangen aliba

mapang ka nung Honibarnü coach Antonio Habas mapa nungi anentsüogo.

"@JuanFerrandoF-i pa indang release clause benoktsü telemtetba agiogo aser iba ajanga pa yoktsüsa kumogo, ajita asünungdang pa @atkmohunbaganfc nung oa dentettsü. Sen onok indang account-i aitra onok asoshi tanga lenmang kecha mali," ta Tandon-isa tweet asü.

Release clause ajanga tanga club temi asayar mesera coach tem, pa/la tang asayaa aliba club nem sen tatakzük ka agütsür sign sütettsü. Sen ya asayar

mesera coach-i agütsütsü.

Tandon-isa, "iba ken o dak sendaka aliertemi release clause dena mebenok tsüngda press nem osang agütsüba ya kanga tia maka. Onok indang squad aser staff temi dena iba osang ya Twitter aser media ajanga meteta aküm."

"Onok indang coach, staff aser asayar anir aoba nung kecha tai mali, ajisüaka tarutsü nungbo inyakyim tajungba benoktsü imlar. Onok indang squad nem dang asüyonga onoki iba osang agütsünüa liasü," ta Tandon-isa tweet asü.

Ferrando lenisüba nung FC Goa-i otsü tasen yanglua, AFC Champions League group stages nung India nung team tem rongnungi point ka ngutetba mezüngbuba club aküm.

2020-21 ISL season nung mapa agizükba sülen Ferrando-i FC Goa team playoffs semifinal tashi len ani.

FC Goa-isa, Ferrando lenisüba nung taküm kum tetenzüklen Durand Cup kokogo. Iba asayamung final nung parnoki penalty ajanga Bengaluru FC koka liasü.

AIFF DC-i Ortiz nem asaya ana tenokdangba agütsü

Luchii/December 20, 2021 (Agencies): Indian Super League (ISL) asaya ka nung mitmebang yimya beshiba atema All India Football Federation (AIFF) Disciplinary Committee-i FC Goa nungi asayar Jorge Ortiz nem asaya ana atema tenokdangba agütsü aser senchi sen 50,000 chiogo.

ISL sangdong ka ajanga ashiba agi, December 11 nü Bambolim nung FC Goa aser Bengaluru FC na asayaba mapang mitmebang yimya beshiba atema aitsüba sülen pai aibelenaliba ngutetogo.

Iba asaya nung ball masayai aliba mapang Ortiz-i opponent team nungi asayar ka dak anongba atema pai aitsü.

Committee nem telangzüba agütsüba mapang Ortiz-i, Bengaluru FC nungi asayar Suresh Singh Wangjam yirutsütsü tibelemba nung pai inyaksangshiba masü ta ashiba den yimya tamajung beshiba

atema tatok meshia liasü, ta ISL sangdong ajangsa metetdaksü. AIFF DC-i, ken o angadangshitsü atema ayongzükba sülen Deobarnü obendang agüja liasü.

Ortiz nem asaya ana atema tenokdangba agütsüba rongnung kabo pa red card achiba nung küptoktsü. Spain nung asayar ya Hokolbarnü Odisha FC den asaya nung masayatetsü, saka December 29 nü ATK Mohun Bagan den asayatsü aliba atemabo shimtetsü.

Kasa mapang nung ATK Mohun Bagan physiotherapist Luis Alfonso Redondo Martinez danga Disciplinary Committee-i senchi sen 40,000 chiogo.

Paa yimya yimpong tamajung beshiba atema aitsü aser tekümdaksü metetdaksüogo, ajisüaka pa nembo tenokdangba kecha magütsü.

Raducanu nem BBC Sports Personality of the Year naroküm agütsü



Luchii/December 20, 2021 (Agencies): Tennis asayar Emma Raducanu nem Deobarnü BBC Sports Personality of the Year naroküm agütsüogo. Taküm U.S. Open akokba sülen la nem iba tetushi agüja liasü.

September ita Raducanu-i U.S. Open final nung Canada tsür Leylah Fernandez koka qualifier tem rongnungi iba asayamung akokba mezüngbuba asayar kuma alima ajunga aoksdaksü.

Arishi kum 19 tain asayar ya British tsürtem rongnungi Virginia Wade-i 1977 kum Wimbledon akokba sülen Grand Slam akoker mezüngbuba asayar aküm.

Iba naroküm asoshi Raducanu-i, diver Tom Daley (tanabuba) aser swimmer Adam Peaty (tasembuba) asre iba den boxer Tyson Fury,

football asayar Raheem Sterling aser Para-cyclist Sarah Storey nung ajateta liasü.

"Nominee tem rongnung züngoksemba kija jia tetushi ulura. Takok anguba atema kanga pelar," ta Raducanu-i ashi. Lai taküm Wimbledon nunga round pezübuba tonga asayaogo.

"Ni British tennis atema kanga pelar, kechiyong asenoki iba naroküm tanaben agizüketogo," ta laisa ashi.

Tennis asayartem rongnungi Andy Murray-i 2016 kum tesüsa iba naroküm agizükler liasü.

Kasa mapang nung skateboarder Sky Brown nem Young Sports Personality of the Year award agütsü. Arishi kum 13 tain asayar yagi Britain atema Olympics nung bronze medal anguba sülen pai nem naroküm agüja liasü.

BILEMDANGANG

"Ali rongsen tali penbura kodanga tenüksunga malitsü."